

ODLUKA

**O PRIHVATANJU ZADUŽENJA PO UGOVORU O ZAJMU IZMEĐU BOSNE I
HERCEGOVINE I EVROPSKE BANKE ZA OBNOVU I RAZVOJ (EBRD) ZA
REALIZACIJU PROJEKTA GRADSKIH SAOBRAĆAJNICA SARAJEVO**

Na osnovu člana 40. stav (5) Zakona o dugu, zaduživanju i garancijama u Federaciji Bosne i Hercegovine ("Službene novine Federacije BiH", br. 86/07, 24/09, 44/10 i 30/16) Predstavnički dom Parlamenta Federacije Bosne i Hercegovine na 12. sjednici održanoj 23.06.2020.godine i Dom naroda Parlamenta Federacije Bosne i Hercegovine na 7. sjednici održanoj 15.10.2020. godine d o n o s i

ODLUKU

O PRIHVATANJU ZADUŽENJA PO UGOVORU O ZAJMU IZMEĐU BOSNE I HERCEGOVINE I EVROPSKE BANKE ZA OBNOVU I RAZVOJ (EBRD) ZA REALIZACIJU PROJEKTA GRADSKIH SAOBRAĆAJNICA SARAJEVO

I.

Prihvata se zaduženje Federacije Bosne i Hercegovine (u daljem tekstu: Federacija BiH) po Ugovoru o zajmu između Evropske banke za obnovu i razvoj (u daljem tekstu: EBRD) i Bosne i Hercegovine (u daljem tekstu: BiH) za realizaciju Projekta gradskih saobraćajnica Sarajevo (u daljem tekstu: Projekat) u iznosu do 30.000.000,00 EUR.

II.

Sredstva zajma iz tačke I. ove Odluke koristit će se za realizaciju Projekta gradskih saobraćajnica Sarajevo. Osnovni cilj i svrha Projekta je poboljšanje ključne cestovne mreže u Kantonu Sarajevo, kroz finansiranje izgradnje i nadogradnje cestovne infrastrukture na dionicama Prve transverzale (Tunel Kobilja Glava) i Devete transverzale kako bi se Grad Sarajevo povezao sa drugim dijelovima Kantona Sarajevo i regionalnom cestovnom mrežom, u cilju smanjenja sadašnjih saobraćajnih gužvi i poboljšanja mobilnosti u regiji.

III.

Sredstva zajma iz tačke I. ove Odluke, odobravaju se Federaciji BiH pod sljedećim uslovima:

- iznos zajma:.....30.000.000,00 EUR-a,
- rok otplate:.....15 godina,
- grace period:.....3 godine (uključen u rok otplate zajma),
- kamatna stopa:.....šestomjesečni EURIBOR plus marža 1% godišnje,
- jednokratna provizija:.....1 % na iznos glavnice zajma,
- dospjeća:.....polugodišnje u jednakim otplatama glavnice,
- provizija na nepovučeni iznos zajma:.....0,5 % godišnje.

IV.

Potvrđuje se da je razmatrana dokumentacija prihvatljiva za Federaciju BiH, a posebno:

- Nacrt Ugovora o zajmu između EBRD-a i BiH;
- Nacrt Projektnog ugovora između Ministarstva saobraćaja Kantona Sarajevo – Direkcija za puteve Kantona Sarajevo i EBRD-a;
- Nacrt Ugovora o podršci projekta između Kantona Sarajevo i EBRD-a;
- Zapisnik sa pregovora.

V.

Sredstva zajma iz tačke I. ove Odluke Federacija BiH će prenijeti na Kanton Sarajevo, koji je krajnji korisnik i dužnik po ovom Ugovoru o zajmu.

U periodu implementacije Projekta, u budžetu Federacije nije potrebno osigurati finansijska sredstva za dodatno sufinansiranje Projekta.

VI.

Zadužuje se Federalno ministarstvo finansija - Federalno ministarstvo financija da sa Kantonom Sarajevo usaglasi i zaključi odgovarajući Podugovor o zajmu kojim će se, u svrhu redovne otplate, definirati uslovi vraćanja sredstava koja se prenose po osnovu zajma iz tačke I. ove Odluke.

VII.

Daje se saglasnost za zaključivanje Supsidijarnog sporazuma između BiH i Federacije BiH, kao i saglasnost za zaključivanje i usaglašavanje odgovarajućeg Podugovora o zajmu između Federacije BiH i Kantona Sarajevo, za sredstva zajma iz tačke I. ove Odluke.

Za potpisivanje Supsidijarnog sporazuma i Podugovora o zajmu, ovlašćuje se federalni ministar finansija – federalni ministar financija.

VIII.

Za realizaciju ove Odluke i izvještavanje zadužuju se Federalno ministarstvo finansija – Federalno ministarstvo financija i Kanton Sarajevo, svako u okviru svoje nadležnosti.

IX.

Implementacija Ugovora o zajmu iz tačke I. ove Odluke ne zahtijeva donošenje novih ili izmjenu postojećih zakona.

X.

Ova Odluka stupa na snagu narednog dana od dana objavljivanja u “Službenim novinama Federacije BiH”.

PF BIH, broj: 01,02-02-348/20
Sarajevo, 15.10.2020.godine

PREDSJEDAVAJUĆI
DOMA NARODA
PARLAMENTA FEDERACIJE BIH

Tomislav Martinović

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BIH

Mirsad Zaimović